

Die Zott iss nimmi global

Grad wie ich gestern ins Audo oisteie wollt, weil ich uff de Kerchhof fahrn sollt, gieht die Hausdier uff, die Fraa guckt eraus unn rieft: Honnes, hosde aach die Zott nit vergesse?

Ich wollt nit iwwer die gonz Gass kreische unn bin e bisje uff se zu gonge: Ei nadierlich, dess hattsde merr heit moin doch schunn dreimol gesacht, unn ich greif in de Säckel von moiner Jack unn zieh e Zott von ner Gießkonn eraus.

Iss joo gut, moont die Fraa unn wollt die Dier widder zu mache, in dem Aacheblick kimmt de Karl mettem Fahrrad oo, steiht ab, stellts Rad on de Gaddezaun unn schnauft: Ei gude, ihr zwaa, was macht ihr dann so?

Gude Karl, sacht die Fraa, ich will die Terrass butze.

Unn ich: Gude, Karl. Ei ich wollt grad uff de Kerchhof fahrn - unn was machsden du?

Ich, de Karl war noch e bisje außer Adem, ich wollt mettem Rad nooch Hochem, was oikaafe. Ach weil merrs grad vom Oikaafe hawwe: Gestern war ich mett de Paula in Meenz, doo hottse e Blus gesucht, unn bei sowas hott enn Monn joo Zeit, sich e bisje umzegucke. Unn was seh ich? - iwwerall in de Läden hosde Schilder geseh, doo hott druffgestonne: Sale, wie de Fluss Saale, nor mett oom a geschriwwe. Wissd ihr was dess haaße soll? Ich habb zwaa Verkäuferinne gefroocht unn die wussde aach nit mehr als dass die Sache unner dene Schilder so richdische Schnäppcher sinn.

Doo nickt moi Fraa: Also Karl, dess iss uns die vorisch Woch genauso gonge, awwer doo hott uns enn onnern Kunde uffgeklärt: Sale odder wie merrs ausspreche dut: Seel, dess det Verkauf haaße, unn wie de Honnes gefroocht hott, warum schreiwwe die dess dann nit - moone die sunnst, die Sache dete verschenkt werrn?, sacht der Monn: Das heißt gleichzeitig Ausverkauf und drückt aus, dass diese Ware besonders günstig ist.

Ja, awwer warum schreibt merr dess nit hie: Günsdisch odder Erunnigesetzt odder so ähnlich, habb ich den Monn gefroocht.

Doo sacht der: Man schreibt Sale, das ist Englisch und ist global, weil auch viele Ausländer in die Geschäfte kommen. Und die kann man mit dem Schlagwort Sale eher auf die günstigen Waren hinweisen als mit den von Ihnen genannten Worten.

No ja, kann soi, moont de Karl, awwer global - dess werd ewe iwwerdriwwe. Uffschmeiße kennt ich mich, wennse im Fernseh statt T-Mobile Tie-Moobeil sache - dess heert sich doch richdisch flerschemerisch oo, iss awwer global.

Ich habb die Achsel gezuckt: Mir misse uns halt droo gewöhne, dass mir in Flerschem jetz aach multikulturell sinn unn dess muss sich aach in unserne Sprooch ausdricke. Mir hawwe jetz vill Fremde hier, mir misse uns umstelle unn misse onnerst babbele.

Ich nit, sacht de Karl, ich bleib bei moiner Muddersprooch, die aach moin Vadder gebabbelt hott. Wenn du moonst, du misst jetz englisch odder global babbele, dann bitte nit mett mir.

Die Fraa guckt uff ihr Uhr: Ich muss was schaffe, also gude Karl. Unn du, Honnes, breng merr de Spree-Hedd widder mett.

Was issen mett der los, schittelt de Karl de Kopp, was sollen dess?

Ja, habb ich gesacht, die moont de Spray Head, de Gießkan-nenbrausekopf. Weil wie ich gesacht habb: mir misse jetz so babbele, dass jeder uns verstehe dut. Unn dess Wort Zott is werkllich nimmi global.

Eiern Honnes